

## **Cuant che a un popul i gjavin la sô lenghe in glesie, al è pront par jessi soterât**

O vês sintût ce maniere che in cheste Domenie Ulive, che e inaugure la setemane de passion, Marc al conte la muart di Crist. E alore mi permetarês che jo chi o disi Messe par furlan.

\* \* \*

Il teme al è obligatori in furlan. Si sêso mai domandâts ce sens che e à la nestre vite, cu lis vitis che o fasìn e che o fasês, cirint di capî il sens de vite dal om? O vivìn par no vivi e o sfadiìn par no concludi. Chi al è dut cence sens.

O dîs: al è impussibil capî la vite dal om cence capî la muart. Cierts filosofis modernis a disin che l'om al è pe muart. Ma ce sens aie la muart? Il dolôr ce sens aial? La nestre vite ce significât aie? Rivìno nô, cul cjâf, a capî ce che al vûl dî? Il cristian al crôt che il vêr sens dal om no si sa cjatâlu dome in chest mont, ma capî ancje ce che e je la muart par capî ce che l'om al è. La muart pal cristianisim al è un mâl, ma nol è dome mâl.

Crist, a mût so, al proteste cuintri la muart. Nol è che a Crist i vedi semeât di risurî. Il sens de muart, secont la fede cristiane, al è peât ae fede. E la fede no capìs; e crôt cence capî. Ce sens aial chest, che la muart dal om no je la fin dal om? Cu la fede si rive adore di dî une robe che si le cjate inte Bibie e che e je il riassunt di dutis lis beatitudins: "Fortunât chel che al mûr tal Signôr".

O savês che il cristianisim al à ditis tantis robis, intercambiant l'ordin de vite. Lui al à dite: "Fortunâts chei che a vain... ; fortunâts chei che a son perseguitâts...". Ma il pont plui grant al è dulà che al dîs: "Fortunâts chei che a muerin". Jo no capis. Biade la ore!

O crôt che Diu, vignint in chest mont, al è muart. Al è propit diventât un di nô, compagn, precîs. Cheste nestre gjernazie umane, la nestre stirpe, e conte fra di se ancje la muart di Diu, e il murî nol è une maludizion; al è ancje une benedizion, jessint lui compagn di nô.

\*\*\*\*

E cumò pensìn a ce che o stin fasint. Cjalait. Jo no ven a dî Messe par furlan par gust di dîle, par fâ folclôr. Nuie di dut chest. Il prin motîf sincîr al è chel chi... il gno popul o vuei che si sinti rispîetât in glesie. O vuei che cuant che si cjatìn devant di Diu, si sintìn propit ducj companj. Leint l'Apocalîs dal timp di vuê, dal Gnûf Testament, si viôt che denant dal tron dal Vieli a jerin int di ogni cualitât, di ogni stirpe e di ogni lenghe.

O dîs e o fâs chest parcè che, devant di Diu, doprâ la proprie lenghe al è rispîetâ il propri popul e al è rispîetâ se stes. Cuant che us parin fûr la vuestre lenghe, che o vês cjapade sù sui zenoi di vuestre mari, chê robe profonde che o vês ta la anime e che e servìs par vivi internementri ogni dì, cuant che us e parin fûr de glesie, us àn za preparâts par jessi soterâts.

\*\*\*

O disìn Messe par furlan parcè che o sin catolics e o crodìn sincerementri che, par jessi catolics, a covente dome la adesion interne da la anime; no covente nissune imposizion fûr di chê. No covente nissune altre robe, e duncje il catholic al è libar di doprâ cualunche lenghe, di assimilâ cualunche tradizion.

E po mi lassais dî des acuis che jo o ai fat a cualchidun di Rome. O ai fat un pôc di davoî. O ai dît di fat: jo o ai viodût che Gjesù Crist al è vignût in chest mont e nol è diventât grêc. Chescj a jerin i parons dal mont: dal pont di viste politic i romans, e dal pont di viste culturâl i grêcs. Lui al è diventât un judeu, nancje un ebreu. Un judeu fi di un popul che al jere dominât di chei altris culturalmentri e juste juste che a tignivin in cjase une lusute di sperance.

Jo o pensi che se Crist al ves di tornâ vuê, al cirarès un popul come il nestri, che no i fâs dispiets a dinissun. Nô, te nestre storie, che e je fate di bielîs robis, di chei ultins cinc secui achì o vin viodût dome tristis robis. Cjalait dome la gravissime migrazion di un secul in ca. Cjalait, in non di Diu: dome voaltris o podês capî cetant mâl che e fâs pa la anime, oltri che pal cuarp. O dîs che il nestri popul nol à mai cirût di meti in pôts vueris; e nô, come popul, o sin ancje stâts sometûts.

\* \* \*

O viodês cemût che Crist, intant de sô passion, al patîs. Ma al patîs cun estreme dignitât, e cuant che al rispuint, come che si lei tai Vanzelis, al rispuint cun frasis che a brusin. No nus à insegnât a lassâsi dominâ. Nus à insegnât a rispîetâsi; a rispîetâ e a fâsi rispîetâ. E cumò us invidi a fâ insieme une preiere par ducj.

*Domenie Ulive  
Kusnach, Svizze, ai 15 i Avrîl dal 1973*